



Sesida dals

Communitgà ils

Protocol nr.

25 d'avrigl 2023

2 da matg 2023

367/2023

Dumonda da la fracziun da la PPS

concernent la criminalitad liada a l'acquisiziun da drogas en la regiun da Cuira
(emprima sutsegnadra Adank)

Resposta da la Regenza

Il consum da narcotics en la classa da vegliadetgna da las persunas minorennas e da las persunas giuvnas creschidas (da 18 fin 24 onns) è sa reducì durant ils onns 2017 fin 2022. Il commerzi cun narcotics è praticamain constant e correspunda a las valurs dals onns 2018/2019. Il dumber dals delicts tenor il Cudesch penal svizzer (CP; CS 311.0) ch'èn vegnids commess da persunas giuvnas creschidas è sut quels dals onns 2017–2019 e levamain sur quels dals onns 2020/2021. Tar ils enguladitschs, tar ils enguladitschs da vehichels cun infracziun e.u.v. pon ins constatar ina reducziun cuntinuanta fin l'onn 2021. L'onn 2022 è il dumber da quests delicts puspè s'augmentà (da 669 a 946 cas). Las cifras actualas correspundan a las valurs dals onns 2015 e 2016.

Tar la dumonda 1: Il dumber da las cuntravenziuns cunter la Lescha da narcotics (LN; CS 812.121) sin il territori da la citad da Cuira è stabil e sa mova dapi l'onn 2016 tranter 389 e 542 cuntravenziuns. L'augment da 20 % da 389 (2021) a 461 (2022) cas registrads resulta da la valur da totalmain 389 cas l'onn 2021, ch'è stada uschè bassa pervia da corona. Cun regard a la statistica resp. a ses svilup durant ils ultims onns ed en vista al fatg ch'il dumber dals delicts constatads en la criminalitad da narcotics s'augmenta cun las mesiras polizialas, ma er en consideraziun dal fatg che la polizia ha rinforzà las mesiras respectivas (prevenziun, repressiun), poi vegnir constatà che la situaziun n'è betg sa pegiurada generalmain sin il territori da la citad da Cuira. La scena en il Stadtpark è dapi 2 onns stabila sin in aut nivel. Ins na scuntra strusch persunas d'ordaifer il chantun (nagin effect d'attracziun). Il potenzial da dependenza da la scena è fitg aut e la sostanza illegala «cocain-freebase» che vegn consumada il pli savens, generescha in'activitad dinamica e hectica da la scena, che sa manifestescha er vers anora. Freebase vegn fimà ed arriva perquai fitg svelt en il sang. Entaifer mo paucas minutas han ins ina sborgna. L'effect tschessa dentant gia

sunter 10 fin 15 minutas. Il desideri da puspè consumar la droga returna fitg svelt. Quai ha consequenzas directas per la criminalitad liada a l'acquisiziun da drogas.

Tar la dumonda 2: Ils ultims 2 onns ha la polizia intensivà las controllas e la lavur da retschertga. Perquai è er il dumber dals delicts ch'ella ha constatà en quest connex, puspè s'augmentà levamain envers l'onn 2021. Tuttina èsi d'ina vart impurtant da mantegnair il squitsch da controlla da la polizia. Da l'autra vart stoi dentant er vina-vant vegnir focussà pli fitg sin il cumbat dal commerzi cun narcotics sco er sin la lavur da retschertga complexa e sin la collavuraziun transcunfinala respectiva. En quest connex ston las stgarsas resursas persunalas existentas vegnir impundidas uschè bain sco pussaivel. Areguard ulteriuras mesiras poi vegnir renvià a l'incumbensa da la Regenza d'elavurar ina Strategia chantunala Dipendenzas sco er a la resposta a la dumonda 4.

Tar la dumonda 3: La collavuraziun tranter la Polizia da la citad da Cuira e la Polizia chantunala funcziuna fitg bain. Ils puncts da contact ed ils process vegnan examinads regularmain ed adattads sche necessari. Ultra da quai vegnan actualmain discutadas tematicas sco dapli controllas cuminaivlas sco er ina collavuraziun pli intensiva en il rom d'acziuns, da patruglias e da stages. Las incumbensas da la polizia giudiziala, en spezial las retschertgas complexas en il sector da la criminalitad da narcotics, ston dentant vegnir liquidadas en mintga cas tras la Polizia chantunala.

Tar la dumonda 4: La Regenza ha concludì da meglierar successivamain las purschidas d'agid simpel per persunas dependentas. Ella prevesa da cuntinuar cun la lavur sociala extra muros (streetwork), da constituer e d'evaluar in nov post da contact e da consultaziun pli grond en in lieu central sco er da meglierar las purschidas d'abitar (cun accompagnament). Cun l'incarica da prestaziun «Streetwork» a l'Uniun per l'agid da survivenza dal Grischun per ils onns 2022–2025 vegn gia realisada la lavur sociala extra muros. Per eventualmain installar e manar in local da consum è responsabla la citad da Cuira.



En num da la Regenza

Il president:

Peter Peyer

Il cancellier:

Daniel Spadin